

## Ölls will lährt sin

Et sind vondage düchtige Kerls. Domauls wörn et no junge Böskens, de no vell lährt mössen. De Welt was moderner worn, un wat äinmaul Luxus was, heier nu ton däglicken Lerben. Dat man'n Auto stürrn kann, dat was binauh ne selbstvoständlicke Forderung worn, un dorümme maken sick use jungen Frünne auk up'n Patt, ümme dän Führerschien to erwerben. Se wörn nich dumm bi'n Unnerricht un wüssen baule Beschäid üarwer de Dinge, de man bi de Prüfung wetten moßte. Auhne Schwierigkäiten keimen se düar. Wenn man owwer'n Führerschien häf, dann will man ock föhrrn, un dorümme besoargen sick Bruno un sinne Frünne des Aumds nen Wagen, un stolz un schneidig word loß fott. Afwesselnd word dat Stürrad betätigt, un dat ging gout, bis de Wagen langsamer word, sinnen lesten

---

Seufzer von sick gaf un stille stund. Olle dräi stiergen ut un bekecken dän Wagen von vorne, von achter und von unner, un man kann nich begriepen, worümme de Wagen nich vonne Stier woll. Bruno kamm endlich up dän richtigen Gedanken. He stelle Kreislaupstörung feste, weil käin Drüppen Benzin mä in'n Tank was.

Ton Glücke was naubi ne Wirtschaft. Von do ut word de Wagenbesitzer anroupen, un de vosprouk, sofort'n Lährjungen met'n Kanister Benzin an dän Wagen to schicken, sodat se baule we föhrrn könn'n. De Dräi bestelln sick in de Tüskentied 'n Rollmops met'n Breitken. Von äiner halben Stunne word ne ganze, vonner ganzen wörn twäi, un ümmer hadde sick käiner meldet met dän Sprit.

Öll de drüdde Rollmops votiert was un ock käin Telefongespräch up de annern Siete annoarm word, et was Geschäftsschluß, do hadde de Töiwerigge käin'n Sinn mä. Schwouren Hertens sette sick ümmer äiner in't Stürrad, un de annern bäiden ersetten düar Muskelkraft, wat de Motor nich mä doun woll. Et was käine lichte Arbäid, un de Schweit läip in Strömen. Up dän lesten End, un öll se sölber auk baule an'n Enne wörn, kamm iahr de Wagenbesitzer entgiergen. He hadde nicks Gottes ahnt un fräig öll von wieten, wat met dän Wagen passeert wör. Öll se dann votelln, se hen'n doch wiargen Benzin telefoniert, do lag de Mann baule an'n Grunne vo lachen. „Menskenkinner“, siar he, „hä ji dann garnich säihn odder merket, dat de Lährjunge met'n Kanister vull Benzin an'n Wagen wian is un ji längst hen'n föhrrn konnt?“ Leider han'n se dat nich merket un dofo nütte schweiten moßt, owwer se wüssen nu, dat et bi'n Autoföhrrn nich blouß up dän Führerschien sondern ock up dän Kopp ankümmt. Dat leste Stükke des Wiarges word met Motorkraft trügge leggt.

---